



Til adressatar i følge liste

Saksbehandlar, innvalstelefon

Tom Dybwad, 5764 3123

## Berdalen naturreservat i Lærdal kommune - melding om oppstart av verneprosess etter naturmangfaldlova etter prosedyren for frivillig skogvern

---

**Dette brevet markerer oppstart med vern etter naturmangfaldlova med oppretting av eit naturreservat i Berdalen i Lærdal kommune, etter prosedyren for frivillig skogvern. Frist for å kome med merknad til denne oppstartmeldinga er 5. desember 2019.**

---

### Bakgrunn

Sidan St.meld. 25 (2002-2003) har frivillig vern, saman med vern på statsgrunn, vore ein av hovudstrategiane for nytt vern av skog i Noreg. Frivillig vern inneber at det er grunneigarane, i samarbeid med skogeigarlaget, som tilbyr staten areal for mogleg vern. Dersom verneverdiane er så store at miljøvernstyresmaktene finn det interessant, vert det så starta forhandlingar mellom staten og grunneigarane. Det vert då forhandla både om avgrensing, verneforskrift og pris, og det vert ikkje inngått avtale om vern med mindre partane vert samde.

Områdevern er likevel ikkje berre ei sak mellom grunneigarar og miljøstyresmakter. Som for tradisjonelle verneprosessar er det difor viktig med ei offentleg høyring der også andre instansar og samfunnsinteresser kan kome med merknader. Naturmangfaldlova §§ 41 og 42 krev også at alle som vernet vedkjem vert informerte når vernearbeidet tek til, slik at dei i god tid før høyringa er best mogleg informerte om korleis det planlagde verneområdet vil kunne gripe inn i deira interesser. Dette er ikkje mindre viktig ved frivillig vern, der forhandlingane med grunneigarane allereie har kome langt når den formelle delen av prosessen startar opp.

Føremålet med dette brevet er å informere om prosessen som no startar opp etter naturmangfaldlova, og å innleie til god medverknad frå aktuelle partar og få innspel til arbeidet med vernesaka.

### Aktuelt verneområde



Det planlagde verneområdet (sjå vedlagt kart) ligg på nordsida av Lærdalen i Lærdal kommune, på gnr. 29 bnr. 1. Grunneigar i området har underskrive avtale om vern som naturreservat (sjå vedlagt kart).

Det planlagde verneområdet omfattar i alt ca. 2794 dekar.

### **Verneverdiar i området**

Tilbudsområdet gjeld eit skogområde som vart kartlagt i samband med utkast til verneplan for «Barskog i Vest-Norge» (DN-rapport 1992-9). Berdalen kom ikkje med som ein del av verneplanen, men er kalla spesialområde, vurdert som svært verneverdig pga at den gamle barskogen her. Området Berdalen (1909,8 da) er skildra slik i Naturbasen:

«Fjellnær blandingsskog av bjørk og furu, mellom anna med einskildtre av særleg grove dimensjonar. Desse er restane etter opprinneleg skog. Ein finn mykje sotmerke på tre og gadder eigna til studier av skogbrannhistorie i turre delar av Vestlandet. Vegetasjonen er i nokre område sterkt påverka av stølsdrift. Nemndt som "spesialområde" i Verneplan for barskog, regionrapport for Vest-Norge (Moe et al. 1992). Under 700 m er det fleire mindre felt med urskogpreg. Over dette veks grov, urskogsliknande furuskog med høgt innslag av bjørk og død ved. Skogtypene er i hovudsak fattige (Gaarder 1991). Feltsjiktet er dominert av lyngarter med røsslyng, fjellkrekling og blåbær som dei viktigaste. Elles finn ein vanlege blåbærskogsartar. Ein liten bestand av olavsstake er registrert av Moe (1994). Moe (1994) har ein detaljert skildring av området. Han vurderer skogen som "meget verneverdig".

Utkastet til grenser for Berdalen naturreservat femner om heile området som vart kartlagt i samband med Verneplanen for barskog i Vest-Norge.

### **Status i kommuneplanen**

I gjeldande kommuneplan for Lærdal er området LNF-område (landbruks-, natur- og friluftsområde).

### **Verneforskrift og grenser**

Ved oppretting av eit naturreservat vert det utarbeidd særskilde verneforskrifter som fortel kva for restriksjonar som vert lagde på aktivitetar i området. Dersom det vert oppretta naturreservat, vil det bli forbod mot tekniske inngrep, hogst og motorferdsel. Beite, vanleg friluftsliv, fiske og vanlegvis også jakt, vil vere lov. For Berdalen har det vore naturleg å ta utgangspunkt i standard mal for skogområde som blir verna som naturreservat. Grunneigar sine innspel er tekne inn så langt det har late seg gjere. Eit utkast til verneforskrift er lagt ved dette brevet. Eigedomstilhøva vert ikkje endra ved oppretting av naturreservat. Kartet som er lagt ved, viser framlegget til naturreservat.

### **Erstatning**

Etter § 50 i naturmangfaldlova har eigar eller rettshavar i område som vert verna som naturreservat rett til erstatning for økonomisk tap når vernet gjer noverande bruk vanskeleg. Ved frivillig vern følgjer ein derimot ikkje den ordinære framgangsmåten ved fastsetjing av erstatning som er omtalt i § 51. Frivillig vern er basert på at partane har vorte samde, også om erstatninga. Difor kan erstatningssummane utbetalast så snart området er verna, utan å vente på dei fristane som er omtalte i § 51.

### **Eigedomstilhøve**

Eigarar av området med framlegg om oppretting av naturreservat er gnr. 29 bnr. 1 i Lærdal kommune.



## Namn

Namn på verneområdet er ein del av verneplanprosessen med høve til å kome med innspel og framlegg. Vi har i samråd med grunneigar vald å bruke *Berdalen naturreservat* som eit arbeidsnamn.

Vi er opne for at det kan vere andre aktuelle namn i området som kan brukast. Statens namnekonsulent kan også ha tungtvegande merknader om namnet.

## Konsekvensar av vernet

For å ta vare på dei sårbare og store naturkvalitetane i området er det nødvendig med ei verneform som sikrar området mot inngrep. Det er difor ønskjeleg å verne om områda som naturreservat etter naturmangfaldlova § 37. Ei slik verneform vil i utgangspunktet forby aktivitetar og nye anlegg som kan skade verneverdiane i naturreservatet. Vernet vil føre til visse restriksjonar på bruk av området, både når det gjeld hogst og andre inngrep. Grunneigarane vil framleis ha rett til jakt og fiske og ålmenta generelt for sanking av sopp og bær. Turstiar som er i området skal også kunne haldast ved like. Dersom det går kraftlinjer gjennom områda skal dei kunna driftast, vedlikehaldast og oppgraderast.

## Brukarinteresser

Fylkesmannen er ikkje kjend med at det er spesielle brukarinteresser i området utanom grunneigar sine jaktinteresser og aktivitet knytt til jakta.

## Saksgang vidare

For å følgje opp Stortinget si satsing på frivillig vern, og for at ikkje grunneigar skal måtte vente unødig på erstatningsutbetalingane, er det sterkt ønskjeleg at saksgangen ikkje vert unødig forseinka for Berdalen naturreservat. Mest aktuell tidsplan er at ein tek sikte på vedtak om vern som naturreservat i juni 2020. Dette føreset ein relativt stram tidsplan, med utsending av eit framlegg på høyring ved årsskiftet 2019-2020.

Frist for å kome med innspel til oppstartmeldinga vert med dette sett til

### 5. desember 2019.

Alle som ønskjer det er velkomne til å kome med innspel til oppstartmeldinga for Berdalen naturreservat.

Fylkesmannen legg opp til å ha synfaring i området i det omfanget grunneigarane og andre interesserte ønskjer.

Etter at framlegget har vore på høyring, vil Fylkesmannen vurdere og oppsummere alle innspela og lage eit framlegg som planlegg å sende på høyring ved årsskiftet med 2 månaders høyringsfrist. Vår tilråding etter høyringa vil vi då kunne sende til Miljødirektoratet kring 1. april, som sender si tilråding til Klima- og miljødepartementet. Departementet vil leggje planen fram til endeleg avgjerd i Regjeringa (Kgl. res.) vonleg i juni 2020. Ei relativt stram tidsramme er naudsynt sidan Miljødirektoratet og Klima- og miljødepartementet vil få eit stort tal saker frå heile landet, og som det vil ta tid å handsame i dei ulike departementa og andre sentrale instansane som skogreservata vedkjem.



### **Adresselister**

Dette brevet er sendt ut til alle grunneigarar og rettshavarar innanfor det aktuelle området, lokale, regionale og nasjonale organ og organisasjonar som kan ha interesse av planarbeidet.

Vi ber om forståing og orsaking for om det skulle vere feil eller manglar ved adresselistene, og ber samstundes om tilbakemelding på manglar eller feil adresse o.l. til Fylkesmannen ved sakshandsamar.

### **Informasjon**

Spørsmål om planarbeidet kan rettast til

- seniorrådgivar Tom Dybwad, tlf. 57 64 31 23, e-post [fmsftd@fylkesmannen.no](mailto:fmsftd@fylkesmannen.no)

### **Skriftlege innspel sendast til**

Fylkesmannen i Vestland, Njøsavegen 2, 6863 Leikanger eller på e-post [fmvlpost@fylkesmannen.no](mailto:fmvlpost@fylkesmannen.no)

Med venleg helsing

Kjell Kvingedal  
miljødirektør

Eline Orheim  
seksjonsleiar

*Dokumentet er elektronisk godkjent*

### Vedlegg:

- Kart over framlegg til Berdalen naturreservat, Lærdal kommune
- Utkast til verneforskrift for Berdalen naturreservat



Mottakarliste:

Visit Sognefjord

Sogn og Fjordane Bondelag

Sogn og Fjordane fylkeskommune

Lærdal Bondelag

Norges Skogeierforbund

Norges Naturvernforbund

Universitetsmuseet i Bergen

Technogarden (nødnett)

Forum for natur og friluftsliv Sogn og Fjordane

Sogn og Fjordane Turlag

Norges Jeger- og Fiskerforbund NJFF Sogn og Fjordane

Norsk institutt for naturforskning NINA

Norsk organisasjon for terrengsykling NOTS

Norges vassdrags- og energidirektorat NVE

Vest Politidistrikt

Norsk Skogbruksforening NORSKOG

Fortidsminneforeningen

Norges jeger- og fiskerforbund

Høgskulen på Vestlandet v/ avd. for naturforvaltning Sogn og Fjordane

Per S. Hjermann

Det Norske Skogselskap

Direktoratet for mineralforvaltning

Avinor

Stadnamntenesta på Vestlandet

Forsvarsbygg

Sogn og Fjordane Skogselskap

Lærdal Turlag

Statens vegvesen region vest

Sogn og Fjordane avd. NOF

Naturvernforbundet i Sogn og Fjordane

Lærdal kommune

Universitetsmuseet i Bergen, Geologisk institutt

SABIMA

Den Norske Turistforening

Statnett

Sogn og Fjordane Bonde- og Småbrukarlag

Lærdal Jeger- og sportsfiskarlag

Verdens Naturfond WWF Norge

Riksantikvaren

Norges geologiske undersøkelse NGU

Luftfartstilsynet



Kopi til:  
Klima- og  
miljødepartementet  
AT Skog  
Miljødirektoratet

## **Vedlegg: Utkast til verneforskrift for Berdalen naturreservat**

### **Forskrift om vern av Berdalen naturreservat, Lærdal kommune, Sogn og Fjordane fylke**

Fastsett ved kongeleg resolusjon **xx.xx.2020** med heimel i lov 19. juni 2009 nr. 100 om forvaltning av naturens mangfald (naturmangfaldlova) § 34 jf. § 37 og § 62. Fremja av Klima- og miljødepartementet.

#### **§ 1. (føremål)**

Føremålet med naturreservatet er å ta vare på eit område i indre Sogn med sitt biologiske og geologiske mangfald, som representerer eit stort og i hovudsak urørt skogområde med eit stort mangfald av skogs- og vegetasjonstypar, der større delar er urskogprega skog. Området inneheld mykje daud ved og har eit stort potensial for sjeldne og krevjande artar.

Det er ei målsetjing å ta vare på verneverdiane i mest mogleg urörd tilstand, med stadeigne artar og naturtypar og naturleg skogdynamikk, og eventuelt vidareutvikle dei.

#### **§ 2. (geografisk avgrensing)**

Naturreservatet vedkjem følgjande gnr./bnr.:  
Lærdal kommune: 29/1

Naturreservatet dekkjer eit totalareal på ca. **2794** dekar. Grensene for naturreservatet går fram av kart datert Klima- og miljødepartementet **xx.xx.2020**. Dei nøyaktige grensene for naturreservatet skal merkast i marka. Knekkpunktka skal koordinatfestast.

Verneforskrifta med kart vert oppbevart i Lærdal kommune, hos Fylkesmannen i Vestland, i Miljødirektoratet og i Klima- og miljødepartementet.

#### **§ 3. (vernereglar)**

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a) Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp inkludert lav eller deler av disse frå naturreservatet. Planting eller såing av tre og annan vegetasjon er forbode.
- b) Dyrelivet, medrekna reirplassar og hiområde, er verna mot skade, øydelegging og unødige forstyrning. Utsetting av dyr er forbode.
- c) Det må ikkje settast i gong tiltak som kan endre naturmiljøet, som f.eks. oppføring av bygningar, anlegg, gjerder, andre varige eller mellombelse innretningar, parkering av campingvogner, brakker e.l., opplag av båtar, framføring av luftleidningar, jordkablar, kloakkleidningar, bygging av veger, drenering eller anna form for tørrlegging, uttak, oppfylling eller lagring av masse, utføring av kloakk eller anna konsentrert ureining, etterlating av avfall, gjødsling, kalking eller bruk av kjemiske plantevern- eller skadedyrmiddel. Forsøpling er forbode. Opplistinga av tiltak er ikkje uttømande.
- d) Bruk av naturreservatet til større arrangement er forbode.
- e) Bålbrenning er forbode.

#### **§ 4. (generelle unntak frå vernereglane)**

Vernereglane i § 3 andre ledd er ikkje til hinder for:

- a) Beiting



- b) Sanking av bær og matsopp.
- c) Jakt og fangst i samsvar med gjeldande lovverk.
- d) Oppsetting av mellombelse, mobile jakttårn for storviltjakt.
- e) Rydding av skotfelt ved jaktpostar slik at feltet er fritt for vegetasjon etter retningslinjer i forvaltningsplan
- f) Felling av store rovdyr i samsvar med gjeldande lovverk.
- g) Utplussing av saltstein for husdyr og storvilt.
- h) Vedlikehald av eksisterande bygningar, gapahukar, jakttårn, stiar, bruer og andre anlegg og innretningar, i samsvar med tilstand på vernetidspunktet.
- i) Merking og rydding av eksisterande stiar vist på vernekartet etter retningslinjer i forvaltningsplan.
- j) Bålbrenning med tørrkvist fra bakken eller medbragt ved i samsvar med gjeldande lovverk.
- k) Rydding av stiar for ferdsel og sanking av beitedyr etter retningslinjer i forvaltningsplan slik at dei kan haldast opne etter vindfall og liknande.

#### **§ 5. (regulering av ferdsel)**

All ferdsel skal skje varsamt og ta omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a) Motorferdsel på land og i vatn er forbode, medrekna landing og start med luftfartøy.
- b) Utanom eksisterande vegar og stiar vist på vernekartet, er bruk av sykkel, hest og kjerre, og riding forbode.

#### **§ 6. (generelle unntak frå ferdselsreglane)**

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulanse-, politi-, brannvern-, rednings- og oppsynsaugemed, og gjennomføring av skjøtsels- og forvaltningsoppgåver som er bestemt av forvaltningsstyresmakta. Unntaket gjeld ikkje øvingsverksemd.

Ferdselsreglane i § 5 andre ledd er ikkje til hinder for:

- a) Naudsynt motorferdsel i samband med uttransport av sjuke og skadde bufe. Køyretøy som vert nytta skal være skånsamt mot markoverflata. Det skal gjevast melding til ansvarleg oppsyn for verneområdet i forkant av køyring.
- b) Naudsynt uttransport av felt elg, hjort og bjørn med lett beltekøyretøy som ikkje set varige spor i terrenget, og med traktor eller lett terrengkøyretøy på eksisterande traktorvegar vist på vernekartet.
- c) Landing og start med Forsvaret sine luftfartøy.

#### **§ 7. (spesifiserte dispensasjonsreglar)**

Forvaltningsstyresmakta kan etter søknad gi dispensasjon til:

- a) Tiltak i samband med forvaltning av vilt og fisk.
- b) Istandsetjing av bygningar, steinmurar, bruer og andre kulturminne etter samråd med kulturminnestyresmaktene
- c) Bygging av nye klopper til erstatning for gamle
- d) Oppsetting av nye fleirårige gapahukar og jakttårn dersom viltet (hjortedyr) endrar trekk.
- e) Naudsynt motorisert transport av ved, material og utstyr til hytter innanfor verneområdet.
- f) Naudsynt motorferdsel for å fjerne gran felt i samsvar med § 7j.
- g) Gjenoppføring av bygningar, anlegg eller innretningar som er gått tapt ved brann eller naturskade, og naudsynt motorferdsel for dette.
- h) Merking og rydding av nye stiar og oppsetting av turpostar.
- i) Tilretteleggingstiltak på eksisterande stiar.
- j) Ringbarking og felling av gran etter retningslinjer i forvaltningsplan
- l) Bruk av naturreservatet i miljøtilpassa reiselivsverksemd etter plan godkjend av forvaltningsstyresmakta.
- m) Naudsynt motorferdsel i samband med aktivitetar nemnd i § 4 g og h, og § 7 a, b, c, og i.



**§ 8. (generelle dispensasjonsreglar)**

Forvaltningsstyresmakta kan gjere unntak frå forskrifta dersom det ikkje strir mot føremålet med vernevedtaket og ikkje kan påverke verneverdiane nemneverdig, eller dersom omsyn til tryggleik eller omsynet til vesentlege samfunnsinteresser gjer det naudsynt, jf. naturmangfaldlova § 48.

**§ 9. (skjøtsel)**

Forvaltningsstyresmakta, eller den forvaltningsstyresmakta bestemmer, kan setje i verk tiltak for å oppretthalde eller oppnå den natur- eller kulturtilstanden som er føremålet med vernet, jf. naturmangfaldlova § 47.

**§ 10. (forvaltningsplan)**

Det kan utarbeidast forvaltningsplan med nærare retningslinjer for forvaltning av naturreservatet. Forvaltningsplanen kan innehalde nærare retningslinjer for gjennomføring av skjøtsel.

**§ 11. (forvaltningsstyresmakt)**

Miljødirektoratet fastset kven som skal vere forvaltningsstyresmakt etter denne forskrifta.

**§ 12. (ikrafttreding)**

Denne forskrifta trer i kraft straks.

\*\*\*





### Vedlegg: Vernekart for Berdalen naturreservat (utkast i oppstartmelding)

